

小草齋集

小草齋集卷之三

陳留謝肇淛著

友人陳仲湊校

四言古詩

南山四章孝子思養其親而不逮也

南山有木風怒號矣
哀哀父母生我勞矣
欲報之德逝其毛矣

南山有楊秋風萎矣
哀哀父母生我勩矣
欲報之德逝其瘳矣

有鳥夜號集于杙矣有子九齡失其恃矣哀我
人斯衣履敝矣

有晷在榆日之夕矣王事靡盬不遑恤矣哀我
人斯何嗟及矣

白雲三章孝子行役而思其親也

瞻彼白雲南山之陽我行邁矣莫敢或遑日兮
月兮遄其闊兮

瞻彼白雲南山之巔我行邁矣莫敢或還月兮
日兮不我卽兮

相彼匏瓜繫于木末我行邁矣載饑載渴山川
逝矣不遑朝夕豈不懷歸王事孔棘

四牡四章大夫行役而思室家也

四牡騤騤維其駉矣顧瞻周道心之瘵矣自我
來思云誰樂矣

四牡騤騤維其虯矣顧瞻周道涕如雨矣自我
來思云誰處矣

駕彼四牡四牡玄黃彼美一人爰如清揚自我
來思云何其臧

閣道踽踽周廬有翼彼美一人華不奕奕豈不
爾思子不我卽

北山八章大夫行役而室家思之也

陟彼北山言采其蓂白雲于飛露彼蘿焉未見
君子憂心悄悄

陟彼西山維日之夕有鳥鳴矣迴翔斯集未見
君子憂心如惄

陟彼危矣以望邦畿周道有蕩浮雲方霏未見
君子憂心則痹

有鵝高飛亦戾于天有魴有鯉亦潛于淵不日
不月曷維其還

有翩翩亦施于栢爰有玄鳥亦巢于宅心之
憂矣曷維其極

琴瑟在房鐘鼓在夏笙鏞既飲于薨之下爾之
徂矣願言則捨

曲房旣好錦衾有爛文茵芳褥有莞斯幔爾之
徂矣願言則旦

鶴鳴于臯雞棲于輅君子于役日月其除慎爾

威儀以永終譽

鴻鴈六章思兄弟也

鴻鴈于飛肅肅其羽父母既遠維予與女木無
附柯以風以雨嗟我懷矣自詒伊阻

鴻鴈于飛其鳴嘹嘹父母既遠靡式斯教不暨
不茨風雨攸漂我之懷矣期爾斯劭

苑彼垂柳蜩蟬嘒嘒濯彼九淵遊魚有泄載脂
既違德音孔戾我之懷矣夙興夜寐

桃丘有鳥翔風自南懷我好音集于平林嗟我

人斯載高載深載浮載沉以無渝其心

維此聖人小心翼翼維彼愚人宣驕以辟天監
不遠維民之則嗟我人斯不瑕有斁

鴻鴈于飛有畢其羽兄弟一方莫或遑處服勤
稼穡無忝爾祖克明其德以篤宗祏

倉庚四章思友也

倉庚鳴矣于彼空谷求其羣矣集于灌木民之
有生式是好德如弦斯膠如圭斯璧人之好之
宣義無斁人之不好胥怨以忒

倉庚交交有炳其羽我有兄弟清酒載酤其肴
伊何魴鱧及脯其䟽伊何烹葵荀蕪其樂伊何
式歌且舞于山之椒于河之澍

倉庚于飛止于苞棘我有兄弟胥遠以域有山
蓋高有水蓋塉人之無良雲泥孔隔旣沈旣訑
困于中澤不念昔者黽勉朝夕

四牡騤騤八鸞喈喈征夫有虺則莫我敢哀爾
之來思式燕以禧爾之不來寧我不思浮游如
雲歸故丘兮自我不見伊三秋兮

青蠅八章刺讒也

貿貿青蠅集于牆茨讒人之言其甘如飴
貿貿青蠅集于叢棘讒人之言覆我邦國
青蠅于飛集于素衣讒言庸矣我躬則疢
青蠅于飛集于素冠讒夫孔多失我所歡
山有喬枝隰有蓂施彼讒人者云胡不夷
山有喬樾隰有蒼蔚彼讒人者胡不殄瘁
明明如月梁得掇之旣明且哲人得說之
苞稂蕝蕝讒言罔極君子敬矣維民之則

雨無極八章閔時也

雨無其極傷我稼穡稼穡瘁止農夫病止零雨
泥止河水瀾止天降喪亂曷維悔止

六月之交終風霾止震雷迅電高山摧止人旣
廢止原隰懷止哀今之人莫或違止

於乎昊天靡吊斯恤胡憯我以陽侯俾我心怵
九閼疾威孰敢叩其室哀我黎民淪胥以越

於乎昊天秉義不類國是靡止交詈爲懟譬彼
湍流則靡所屆人各有心孰云不逮

於乎昊天胡俾羣小以慝如豺如狼如虺如蜴
如賈二倍胥攘奪以殛如彼甫田胥爲蟲賊
於乎昊天民旣不寧咀呪反側如朽是棄黃髮
卿士則莫我作朋人之云亡曾莫之懲

於乎昊天不憝遺一老并溲不食曷云其保皎
皎白駒于彼空道心之憂矣我辰不造

於乎昊天維命不常念爾皇祖靡猶不臧是顧
是復何用不穀小臣作頌敢告司僕

泊臺五章懷故也

爰有泊臺在河之許河水洋洋衡門之下旣脂
我車旣秣我馬及我良朋爰居爰處

我車旣脂我馬旣馳僕夫旣痛則莫我所之柔
篲何其垂楊載圍自我不見中心徘徊

我之來思池有函萐及我至止維塵有黜苑彼
麋蕪繁霜卒斬駕言出遊俾也無嫌

爵彼扶荔其實離離有橘有柚載俎載卮旣彼
歸鳥棲于南枝念我遠人憂心如泥

瞻彼南山白雲徂矣在水一方云誰盱矣譁彼

棠棣天其華矣念我遠人不遑家矣

述祖德詩訓湘潼二弟二十章

有序

序曰余以萬曆壬子之秋持節北上是時慈親白髮銜哀祖道仲弟遭疾季氏垂髫殞涕解維情不自割翼歲余以水部郎出鎮桃丘王事靡盬不遑懷歸每一望雲聞鴈泪隨聲落獨念二弟少而失怙惑愛墮聰寡聞闕教靡思析薪負荷之艱豈無鄰庄漁獵之感雖鞭之長不能及馬腹也聊爲纂述今昔以示

訓誠

於穆先王降神于嶽作帝元舅保釐南國南國
克造閔此遺略貽厥孫謀禮義卒獲嗚呼悠哉
世載其德

世德伊何克昌厥嗣堯卿牧楚殫威克惠占天
知地與神合契輔宣陳疇文儀洽藝道言弗庸
垂芳奕世

桓桓太傅天縱其德卧于東山出處不忒午祚
式微帝賚之弱有赫斯庸思同召伯受命于天

子孫千億

猗惟我宗代有聞譽芝蘭玉樹迨于封胡敷旣
真隱沉亦國瑚宣遠玄暉清風穆如啓佑後人
亦孔之都

昔在中葉孤祊遺裔蟬蛸息壤于海壇之溼帝
謂皇祖德音不戾無二無虞秉仁宣義昭格不
遠克昌厥世

皇祖孔武轍周四方遭時播越屣彼舊疆乃褰
其糧如集斯翔陟降胼胝相其陰陽山川臚臚

曰江田是鄉

蔚彼江田東漸於海龍龕雀鬼飛沙皚皚洪濤
濯濯溪流浼浼有龍有虎有鱣有鮪有蜃有珎
有蘭有茝椒聊蕃矣千百斯載

乃生中丞允文允武聲律身度自我作古蔽帝
甘棠盱江之許靖綏疆場馘彼醜虜惟帝念功
載錫斯祐黃腸珠襦玉魚石馬

乃生廣文克明克俊稽古斯獲有美嘉聞水鐸
作人如時雨潤棲遲衡門巾車游韞教誨式穀

若于古訓展也君子儀我後進

羣從濟濟雋喆代興如雲從龍如風翼鵬觀察
牧守矜矜兢兢至于司徒垂統式弘勲庸鐘鼎
萬邦丕承蔚彼高藻如岡如陵

於乎皇考遭家不造拂亂備嘗夙夜探討耿彼
素心如玉在葆明德惟馨假于蒼昊貞固爲幹
寧一爲寶其不可聞性與天道

帝謂皇考絃歌百里惴惴小心夙夜敬止天
子湯沐是旬是視相比大邦其門如水不愆于

度不數于軌。睠言東歸。以燕翼子。

昊天不弔。中道降割。藐爾諸孤。如集于筭。母氏聖善。劬勞顧察。常虞疾疢。聿飴甘滑。銜蓼茹辛。期爾斯達。爾之不達。母氏則怛。

曰。予小子冥頑不聰。亦既老大。厥心猶童。忝竊微祿。困躋孤蹤。譬彼浮雲。靡靡隨風。縣縣遠道。憂心忉忉。日月逝矣。曷維其同。

咨爾仲氏。質弱春萑。學未升堂。困于蒺藜。爾行弗堅。爾識迺迷。營道無烈。造次則虧。爾之柔矣。

割愛斯強爾之聞矣親賢斯明

咨爾李氏兩髦有巾如彼日月升于震旦飽煖
逸居四體判渙載號載呶禮儀卒亂勿謂無傷
迺成大患勿謂少年寤言則肝

人亦有言習與性成匪性斯成惟習攸營匠則
有矩矱則有繫顛越先緒匪聳斯盲金玉滿堂
盜瞰其藏宛其死矣腐草之光

人亦有言皎皎素絲雖云素絲玄黃染之良言
如藥苦口不飴巧言如簞爰喪其師宴安孔懷

歌舞孔嬉淪胥以敗惟身攸悲

昔我行矣八月仲秋今我來思朔風颼颼載離
寒暑我心則憂鴻鴈于飛其鳴啾啾瞻彼南山
道阻且脩安得晨風與子好仇

於乎小子各敬爾守無婦言是用沉湎于酒惟
勤無斁維慎無咎惟德惟厚可以長久往者不
可追聊悲爾後於乎戒之天命不又

中秋泊臺同社諸子燕集分得咸韻

高臺經始淥波半涵明月在天微雲相參我有

嘉賓載觴載談示我德音和樂不耽玄鳥于歸
驚鴻戾南物猶如此人何以堪

壬子上巳同汝翔伯孺諸子汎舟西湖四
章

時之屈矣維莫之春方之舟矣在河之濔有觴
旣羽有草斯茵何斯求斯式燕以親
湖水湯湯孤山蒼蒼陟彼硯矣在水中央泳之
游之以翔以翔侯誰在矣泣涕沾裳

倉庚于飛懷我好音君子有酒載仇載斟飄風

自南吹我素襟今者不樂逝者其陰

倉庚于飛有莞其羽賓既醉止式號且舞檜楫
夷猶錦纜如組優哉游哉以求斯祐

上巳同林謹任都諫王永啓比部徐興公
山人陪喻刺史周司理桑溪禊飲三章

桑之水維石鄰鄰彼其之子毳衣朱輪春服既
御羽觴載陳疇胥樂矣亦孔之辰

桑之水其流瀾瀾挹彼注茲如杭斯葦踞于磐
石載行載止于胥樂矣亦孔之有

蕭蕭子規啼于中谷彼其之子南畝是俶嗟彼
保介訊之種稊于胥樂矣王度如玉

贈鄭孟麟八章

昔我皇祖受命于申之屏之翰四方于句不僭
不濫於昭于天旣仁且哲以保我後人

穆穆皇考克明其德綏彼百里視民不忒彝倫
攸叙南土是式顧我復我昊天罔極

爲姑相攸陟降庭止天作之合嬪于鄭止蕉溪
之陽淑人孟止燕婉之求夙夜敬止

有斐孟氏如圭如璋其儀不忒其言有章式于古訓溫克是常小心翼翼邦家之慶

鳳皇于飛其文九苞我覲之子德音孔膠如彼農夫是蓰是薦如彼玄黃匪市斯朝

鳳皇鳴矣其音喈喈我覲之子漸于天階四牡騤騤雲旂昭回鳴乎杳矣亦孔之懷

曰余小子困頓不慧鮮行其德言不及義憂心惴惴如富斯醉既見君子我心則企

於乎兄弟大命近止各敬爾身無胥癯止無斃

維名不顯維德載寢載興慎旃無忒

福藩紀行十四章

於昭神祖明德配天肇造區夏啓佑後人帝
命不顯祚胤維新如麟之趾子孫振振

振振維何神明之裔本支不億山河帶礪至我
天子文武宣義萬有千歲以昌厥世

其世伊何維帝出震兄及弟矣式序以順錫爾
介圭朱芾有駿永啓爾宇弼我皇運

帝命司空相王之邸洛水泱泱金城萬雉如竹

斯也如輦斯綺謂王行矣賜爾四履

帝命司徒徹王之土田乃千斯倉乃萬斯廩有
車旣攻有馬旣閑 帝命傅氏爲王遄遷

穆穆我王克共克惠如圭如璧夙夜匪懈旣柔
且直以遠罪悔宜民宜人受祿未有艾

維暮之春吉日孔明旭日遲遲有鳴倉庚千騎
彭彭八鸞將將 天子命我都彼洛陽

王乘朱輅袞衣繡裳皮弁有頍赤舄煌煌再拜
稽首武邁其行 帝曰敬矣受祉無疆

春雲有輝麗此皇都濟濟百辟袞衣載途駕此
騏驎或旆或旗戎有良翰胥驩以呼

潞河洋洋建瓴千里馮夷靖波天吳屏止青雀
黃龍錦帆有韓伐鼓考鍾盈河之涖

帝命司馬戒王舟車萬艘如雲鵠翔龍趨有驪
有騶有駒有駟爛其盈矣于王之都

乃旅泰山于彼東方黼衣秉玉燔柴以薌曰牡
駢剛犧尊豆房神之假爾俾熾而昌

乃禋于河或燔或炙左右奉璋鞠躬有翼豆登

以薦禮儀卒獲神之假爾介以景福

其福伊何宣昭義問無疆遊于荒式是古訓
疊我王藩 天子之室子子孫孫德音罔極

清詩二首

宛彼鳴蜩集于蓼枝云誰邁矣載渴載饑嗟我
人斯其音有微曠世齊德異地神飛豈不爾思
遠莫致之

昔我之往白桐載華今我來思青槐蕭疎王事
靡盬靡室靡家置酒高臺投餌長川自我不見

于今三年

寄徐興公二首

烈心無營大音不賞有美於斯邈焉獨往鳳鳴
于梧雞棲于峙矯首浮雲曷能奮飛

遊以暢神詩以奏懷靡奇弗屈靡言弗佳自我
徂矣云誰與偕山高水深悠悠我心

夏日小園作

朱景徂夏溽氣鑠金乘此惠風駕言北林仰嘆
鳶戾俯羨魚沉徙倚脩竹載觴載吟寄賞流盼

托素諧心會稽河朔眷言所欽

離合郡姓名詩

阻世局處且行且藏

離下字

蝦蟇朝齧蟄蟲潛方

離東字合成陳

貿業弗售懷貝含章

離卯字

里耳見棄遺

土迓光

離田字合成留

脩詞孔嫺孰司玄黃

離言字

榭顛

夏覆一木安強

離射字合成謝

啓齒欲吐緘口以臧

離改

字

津梁旣超水陸兩忘

離聿字合成肇

涯涘百里去矣

何方

離水字

製彼芰荷誰衣誰裳

離制字合成制

存此永

貞子畏于匡

離才字

風塵自遠失鹿空望

離土字合成在

杳然素心日逝月長

離本字

骸骸千載俠骨埋香

離亢字
合成杭

小草齋集卷之三終

小草齋集卷之四

陳留謝肇淛著

友人曹學佺校

五言古詩一

古意四首

高秋生悲風明月上東林相思夜苦長促織啼
花陰之子萬里餘涕下雙沾襟欲涉川無梁江
河寒且深人生如落葉離合難重尋女蘿附松
栢可以喻素心我有綠綺琴爲君鳴哀音

灼灼庭中蘭翠蕤挺瑀枝願言掇其英將以遺
所思天長隔秋水芬芳莫致之人生不脩翰能
無生離悲

朔風吹高枝寒霜沾衣裳羣燕辭故壘耿耿秋
夜長俯視百卉腓仰見鴈南翔縣縣悲遠路遊
子天一方行役踰十年塵埃掩空房自恨非喬
松紅顏詎能常生當加餐飯死當歸故鄉

客從遠方來遺我一尺刺刺中何所有宛轉迴
文字感此千里心懷之恐失墜三載君不歸開

視心如醉願爲雙鷦鷯舉翼不相離

秋興四首

行行出西郊天高氣蕭索寒烟暝村原金風戒
林薄鴻鴈數行飛梧桐一葉落物情有代謝人
生易漂泊含元草離離金谷久寂寞惟有素心
人獨往寄丘壑長嘯蘇門山脩如雲中鶴遐哉
太古心寧與世人角

秋田黃粱肥秋山松花飛倚松結茆茨空翠上
人衣中有守真人行謨采蕨薇洗耳臨清流猿

鳥環窺扉金塵不得餐衡門聊樂饑鴟鳶嚇腐
鼠鵲雛擇芬腍微尚幸有適卧看浮雲馳

哀哀鳴樹蟬咽咽出山泉金粟臺畔草鬱鬱生
紫烟鹿麋遊其上牧童唱其巔當年無諸氏擅
雄南海埭霸圖剗沐櫛反掌俱索然人事成今
古興亡易變遷水光與山色逢秋尚清妍吊古
隕長涕落日啼杜鵑

東籬菊吐黃江上芙蓉發攀條擷其英秀色射
人骨落日下激潭盪漾半明沒田父負遺秉牧

童扣牛角衣食無餘營行謁松風答而我厭樊
籠對此忘饑渴會心豈在遠諸賞意自合興是
清秋生趣以山野豁所以漢陰叟抱甕甘澆澆
機事傷天真吾道在用拙

從軍行送老卒還鄉

太白秋旦天胡雛窺青海前軍初合圍夜奪單
于壘調弓上新弦勁馬蒙重鎧血滿川原腥雲
愁天地改功成百戰餘老去一身在腰間雙寶
刀缺盡無光彩往事春夢中驚定還自悔空巷

無四隣倚杖柴門外

短歌

客莫辭清尊聽我歌一言人年幾滿百百年亦
晨昏昔時健犢兒今抱乳下孫嚴霜被弱草榮
華豈久存草死春還生人無復起魂寂寞身後
名榮辱向誰論不如飲旨酒醉卧驅憂煩

前有一尊酒行

置酒在高堂珍羞縱橫陳起舞應妙節秦歌高
入雲明月正當牖和風揚奇芬主人起洗爵四

坐笑紛紜飲者富壽考子孫多且賢

何當行

舉世重黃金金多交始深可憐貧賤士悠悠空
此心威鳳乘時翥潛龍隨風吟同氣自相應豈
在浮與沉

飛塵篇

飛塵蔽白日天地失其明讒夫亂四國慈母不
相親河漢深且廣高山多浮雲哀哉行路難此
事難重陳

秋蘭篇

秋蘭脩蔓乃在空谷中下有清淺泉上有浮
烟籠歲暮鷓鴣鳴玉露凋寒叢羞與衆桃李強
顏逐春風君子慎明德有初鮮克終

明月篇

明月照杏梁皎皎流素光思婦在高樓徘徊夜
未央當窓理瑤瑟開鑒牖爲粧雲中有孤鴈嘹
唳啼秋霜飛蓬本無根隨風轉路傍遊子不顧
返盛年安可常

天行篇

天行無停軌
曜如轉輪元氣鼓橐籥四始遞
推新陰陽鑄萬物倏忽成灰塵何爲自局促鬱
鬱長苦辛

飛龍篇

若木煥東海神光被四陲天門開黃道潛龍乘
時飛重淵葆陽德昌運生靈輝矯首太乙居縱
轡金光扉彤雲颺回飈照耀六銖衣斗樞西北
旋華蓋翼紫微天下當文明湛露隨陽晞

種瓜篇

種瓜沙圃中引蔓金井闌本擬得高托何意轉
道邊與君結婚姻恩愛兩不相投君雙鳳釵贈
妾玉連環釵以象于飛環以相周旋中道忽割
絕飄如風中烟四時信金石陰陽亦推遷君子
慎明德賤妾何足言

名都篇

名都二三月家家桃李花少女踏春陽統綺鮮
容華微笑啓皓齒迴風揚素波道逢冶遊子紫

騶白玉珂左攬繁弱弓右接雙駕鶯鶯宛轉縱流
盼目送行且歌低徊遵下路輕裾曳明霞將飛
復未翔柰此腸斷何

美女篇

美女閑且都采桑城南隅明媚腰束素被服純
羅襦穠淡合自然雙蛾纖若無頭上金爵釵一
一銜明珠皓腕玉條脫雜珮鳴珊瑚微風振弱
體搖搖颺輕裾清歌初啓齒蘭氣芬庭除使君
從東來五馬爲踟躕踟躕亦何爲羅敷自有夫

鴛鴦冒淺草鳳皇巢高梧君其迴玉駕各保千金軀

白馬篇

白馬玉花鬣錦鞵金玲瓏碧蹄汗流血振鬣嘶
霜風五陵少年兒蹀躞長楸中顧影自矜炫指
盼生豪雄左抽金僕姑右發烏號弓回頭殪飛
兔翻身貫雙鴻百返無纖塵馳騁若乘空行人
爭道好頰仰無驕容一朝軍書下投名甘泉宮
天子賜顏色幕府推前鋒飛泉出䟽勒鳴劍馳

山戎誓雪百王恥不數全師功安能守妻子雙
鬢坐飛蓬

升天行

百年苦局促九州不可居策此汗漫駕步言遊
太虛羽蓋紫鸞驂玉軸蒼螭車一息九萬里剽
風吹遽遽黃道啓閭闔紫微翼清都丹墀謁上
帝佩聲趨以徐玉女左右侍絳節仙童扶羲和
整前轡燭龍銜明珠羣叟攬六箸揖我升東除
飲我沆瀣漿贈我雙玉壺自得昇真訣永特造

化樞寄謝蟬蛸輩空哀過隙駒

遠遊篇

丈夫志桑弧安事一室間五岳自足下萬里胡
足言薄遊東海岸矯首崑崙巔長風吹大壑簸
蕩滄溟天遊鯢戲其下鼓鬣吞百川絳闕金銀
宮照耀飛流丹玉女六七輩霓衣輕且鮮投我
以雜佩珊瑚間木難碧盃注瓊液玉塵爲我殮
一七瘵饑渴再引駐顏顏朝遊析木津夕憇洱
海堧千載一來歸城郭半已遷委蛻何足惜神

氣長浩然至今緱嶺上鶴馭猶踟躕

事君行

日月有虧昃天地難爲明周公雖神聖滔滔尚
東征孔氏墮三都女樂速其行部盆罕幽燭浮
雲蔽陽精精誠貫金石君心終未傾願迴若木
光一察葵藿情此言不可竟欲竟汨縱橫

苦思行

南山有桂樹葛藟繫其枝秋風忽摧拉枯槁終
不移人生一寸心長貯萬里思萬里豈爲遠百

年無絕期夕燈照幽泪曉鏡知顰眉緒亂不可
理意結空自持年年望牛女歎息還語誰

鬪雞篇

衆樂且停聲百戰莫登場小兒呈妙技鬪雞分
成行東西各異隊雲錦爭翱翔含嗔奮彩臆觝
首互低昂芥羽一何烈金距亦以剛裂冠灑紅
雨碎羽飄霓裳敗軍猶苦戰勝氣殊飛揚徘徊
自長鳴餘威震鄰疆木雞全其德虛憍何足張

驅車篇

驅車上東門野曠郊無烟白楊紛成行悲風號
其間妖狐竄荒隧蔓草纏頽棺烏鳶噪日夕澗
水鳴潺湲昔時生華屋倏已閉重淵重淵不復
晨山鬼相往還親戚不我顧子孫各爲歡感彼
薤上露歎息蜉蝣篇不如飲美酒服食延天年

種葛篇

種葛東籬下引蔓高松枝以此荏苒條託彼雲
霄姿結髮事君子恩義兩不疑生死誓同穴偕
老無睽攜琴瑟各靜好脂髓罕違儀宛若雲中

翼連理恒雙棲自恃瑤華質更信山河詞永言
矢繾綣長以奉音徽一朝人事改親昵成仇儻
駕言出北林習習谷風吹黃鳥求其侶睨睨鳴
聲悲感此涕沾臆進退失所宜華釵不耀首膏
沐誰爲施容華自搖落德音庶不虧悠悠委造
化嗟惻亦何爲

遊俠篇

華堂會高客幸舍集衆賓魏冠躡珠履辯說縱
橫陳玉勒控紫燕白金裝龍脣朝馳大梁道夕

戲伊水濱相逢輸肝膽生死諒不湮丈夫快恩
讎四海皆周親信陵旣存趙孟嘗亦脫秦一諾
甘刎頸鴻毛安足論百年終歸盡俠骨高嶙峋
愧彼寒蟬輩奄奄泉下人

遊獵篇

玄冬氣隆烈朔風高怒號萬彙方徂落平楚皆
蓬蒿順時鬯殺氣駕言田西郊虞人戒置豚竟
埜張鋌矛我車堅旣攻駟介阜且高韎韜爛雲
霞鞞琫裝吳刀前驅抗長旌後騎曳輕旂遙遙

合長圍劒戟相周遭烽火烈原野鼓噪動平臯
由基逞妙技貫育爭怒虢聯矢落雙鵬空拳接
飛猱蒼狔躡叢棘青兕殪纂縻金鞬下角鷹鐵
絙喉神燄瞬息但見影百里空秋毫紅雨灑腥
血白雪飄風毛雉鹿收不盡狐兔安能逃屬車
恣負載典客催烹包玉瓚斟黃流雲俎登嘉肴
鳴鐘考朗鼓拊瑟和龍璫行爵已無算百戲仍
分曹載薦東海棗復進綏山桃曜靈西弭轡望
舒東懸貽華堂炳明燭主客樂陶陶人生苦憂

煎促若火消膏行樂尚未畢白楊且蕭騷七尺
馬蹄間萬里行游飢

招隱

朝處鞅逢迎市居伍牙儉貴賤不同科風塵豈
殊類南山有桂叢游雲團如蓋海月照松門澗
風吹蘿帶構戶倚巖穴萬壑自何背晨進靈木
餐夕紉秋蘭佩牧犢嘉樹陰聽鶯孤雲外孤雲
復蒼蒼伊人竟何在履約名乃豐身枯道彌泰
富貴不可求息駕遵時晦

聽劉季德彈琴

掃我青羅陰彈君綠綺琴明月東方來微風生
高林飛霜歛落葉萬壑鳴秋砧淒淒繁絃調悠
悠太古心夜靜無人語疑是蛟龍吟曲罷白雲
飛山水爲知音聊以寫素懷不用微黃金

長安待月

向夕宇氣高微雲散天末暗風動羅幔涼露侵
綾襪寒蛩悲相語四壁人聲絕忽見雲際山飛
來海上月清光似故園寧知幾圓缺寒暑會有

時念此遠行客漏盡不得寐疎燈半明滅

喜雨

陽氣久驕寒今朝雨亦佳出門見山色空濛雲
滿車觸石遞崇高白日無光華雷電迅旬薄驚
破深林鴉少女忽反風雨脚亂如麻小者如唾
珠大如風飛花須臾平疇上青青齊孚茅應龍
既奮蟄枯鮒何當嗟

游子嘆

飄風逐浮雲雲散隨所向游子辭高堂乃在燕

臺上燕臺高突兀雙闕鬱相望三月富鶯花遊
子空惆悵鵲巢知天風鶯壘知天霜相思萬里
餘誰爲授衣裳別離日已多鬢髮日已改新柳
飛楊花故物悲老大願隨晨風翰高征向南海
月下聽吳君寵彈琴

積雨夕云霽風生嘉樹林諸峰吐微月諧此物
外心櫛髮石榻上拂拭龍脣琴客有羽衣者爲
鼓水龍吟大絃濁春溫細絃澈秋陰一彈再三
嘆萬壑有餘音蕭蕭木葉下四郊驚棲禽似聞

西山高又聞滄海深余亦懷獨往因之感陸沉
行路嘆

客夢政還家雞鳴何太早星月落前楹僕夫催
上道道路曠連縣遠近無城堡荒縣茅茨殘山
田禾黍稿寒日照郊墟饑民隨梨棗村店幾家
存寄食殊草草感此行路難令人顏色老歸來
武夷山醉卧層雲島

采菱詞

儂家太湖西門前青青柳別來五作花搖落君

知否秋風吹菱花水蕩菱花落儂貌比菱花郎
比秋風薄

早春登烟雨樓

春水與天碧雲色澹人心坐來不知寒烟林深
復深芳樹變啼鳥殘雪明遙岑惘然理歸棹中
流鐘磬音

秋夜懷陳汝翔

涼風下木葉蟋蟀鳴我堂河漢當前楹耿耿夜
未央舊燕知新社北鴈哀南翔端此感物化搖

落悲衆芳眷彼同心子乃在天一方
白日日趨短相思日趨長豈無萬里
翰慰此九迴腸不見
參與商夜夜永相望

舟滯四安

暮春人意困况在孤舟間澄江度遲日子規啼
空山一啼復一歎凋傷遊子顏吾聞東園公採
芝猶未還

甲午元日

羲和無停馭寒暑一轉轂流水不返源華髮難

再綠作吏春復冬強半謀參朮如何青陽氏短
景彌相逐東風解河水柔條吐新簇物情有代
謝我生猶雌伏早歲懷素心中道失初服在家
親戚憐出家豺虎毒如絃棄道周屈曲傷我足
所以貴聖人被褐而懷玉

送周喬卿還家

短歌無餘聲送子還故都勁風凋馬毛密霰霏
長途奚囊負輕裝中惟雙湛盧貂裘不堪着故
園日荒蕪舉世希知音齊王好者等駿馬空有

骨美人但按圖所以大雅士鬱鬱無所如且登
越王臺爲我吊無諸興亡已陳迹人世真蘧廬
貧亦不足憂貴亦不足趨達人有大觀君子崇
訏謨去去勿復顧雙涕零交衢

代王百穀悼亡二首

人事多參商譬彼弦與筈十五事君子素心同
明月弱絲附高枝欣此千秋托紅顏不羽翰安
能久爲客夜臺何茫茫虞淵無晨日死者日以
長生者日以短爲妾語君子努力加餐飯

出門望北却白楊森纍纍悲風從天來霜露何
淒其花落不歸枝水流詎返西紅粉委芳艸香
塵空蕙帷秋氣急鳴蟬蟋蟀中夜啼落月照流
黃恍惚如見之豈無少君術慰此長渴饑

達人知天命脩短不復疑身世一遽廬天地有
盡時吾愛鼓盆子忘情觀運移爾旣反於真而
我猶人倚古來彭與殤百年同所歸

江上晚行

曰余失初服陸沉寄遊宦忽忽暑去徂行行日

已晏黃葉幾家砧。殘霞數聲鴈。風螢墜還飛。蘆花開未綻。遠山漸欲沉。微星乍可辨。漁燈出窮浦。蛙鼓鳴幽澗。布帆捲浪輕。舟子乘舵慣。豈以林澤心。乃有風波患。自知世皆魔。轉覺身爲幻。不見潛天蚪。蟠飛安可羨。

與客問答二首

甲午歲

門有萬里客。來自東南方。芒屨衣短後。意色何倉皇。主人揖客坐。設食開中堂。客食不舉。筋欲言涕沾裳。發篋授尺書。讀書一何長。上言親戚

喪下言離亂傷

長跼挽客裾故鄉今何如客但再三歎故鄉不
可居連年旱復蝗民無旦暮儲官府禁遏糴富
室急追租五月初三日餓孍譟通衢白丸斫富
商赤丸掠村墟骸骨亂如麻處處狐與烏脫身
得西走但幸保頭顱

主人聞客言涕伏不能興出門東南望哀哉晉
安城昔爲桑與麻今爲荆與榛白髮在高堂游
子寤寐驚燕雀知故簷牛羊知故垆歸種南山

豆會俟黃河清

過釣臺

咄咄嚴子陵未必真避世安車入漢廷諫議非
其志懷仁輔義言玄理竟未試垂釣豈在魚此
意誰能契我欲往從之敝屣安足棄眷茲一片
石忽墮千古泪榮名亦黃土何用復軒輊不聞
至人言知希則我貴

苦蚊

中宵塞翠幃白鳥何翩翩嘯聚喧成雷嗜膚不

得眠但恐涼風來驅入塵埃間造物惡用爾微
命竊自全君看菌與椿各有小大年

乙未元日試筆寄社中諸子

玄冥旣潛功青陽初秉和嵎谷回薰飈層林蘖
朱柯仰盼衆芳轉俯悲人事過莫待紅顏好白
首空蹉跎妄意千秋業冉冉今如何寄言各努
力幸無俟黃河

送陳幼孺還家

吾以五斗米折腰笠澤濱朝來拭麈鏡面目亦

可憎故人天外至重尋雞壇盟吐舌唾清論使
我心魂驚自言對公車挾策上帝京獻賦不
見收剖心誰爲明操瑟復何之歸聽閩山鶯白
髮在高堂遊子若爲情且飲一杯酒送子孤蓬
征風塵無自苦造物有枯榮試聽匣中劍猶作
雌雄鳴努力在千秋市道安足營

初秋作

一葉下高樹天地忽已秋明河耿長夜大火西
南流牛女佳期近欲度還復留人生多離恨天

運固阻脩沙際雙白鳥縱翰何夷猶因茲有冥契願與靜者遊

牛女詞

秋露冷天階明河如素練黃姑與織女歲歲來相見相見卽相離含情不能語雙泪落九天散作三秋雨

感懷

日月如矢激三十忽有九老大私自憐書劒竟何有豈以龍虎性而從牛馬走賸對蒼弁雲誰

典烏程酒蛛絲上層簷燕泥落虛牖庭收霜後
柑畦剪雨中韭俸僅飽妻孥跡已絕賓友一官
嘆積薪萬事同敝帚昔如逐兔鷹今作守雞狗
吾愛柴桑翁悠然棄五斗寄語舊東山猿鶴今
在否

十月望同徐興公顧長卿世卿泛舟碧浪
湖登浮玉塔看月

斜照入寒山落霞滿秋水刺舟碧浪中坐看孤
雲起風急蘆花飛霜清木葉墮明月忽飛來寒

色射四坐玉鏡半空開金光百道繞時挂浮圖
巔還如慧燈照漁艇弄橫笛棹破水中影斷鴈
哀遠天踈鐘隔遙嶺夜盡露氣微相對澹忘歸
澄江淨如練却媿謝玄暉

馴鴿篇

虛庭棲馴鴿雙飛何翩躚玉剪文翼齊羽衣白
雪鮮一朝失其偶奇音向誰宣窺沼舞孤影悽
惻不能言衆雛中夜啼聞者鼻俱酸君看一鳥
微存歿無棄捐人情非金石反掌生波瀾感此

發孤嘯悲風吹歲寒

鄧女高王王生徐興公陳永奉集郡齋

宿雨旣云霽新醪亦初熟天未逢故人感嘆骨
與肉孤月生高松寒聲滿脩竹欲別意茫然風
塵多愁目

偶書

駸明立堂下一言遂見知太阿埋古獄人猶拂
拭之嗟哉千古事今時棄若泥石破方見玉頰
脫方知錐鵲雛棲蓬蒿竟爲斥鷃嗤鄧禹久笑

人彭澤真吾師

雪

朔風薄長天凍雲不到地白日無精光密霰藹
而至歷亂柳絮飛輕縈天花墜緣薶積廣庭入
隙凝塵箭玉樹旣繽紛瑤階亦霑被素容冶可
親寒輝宛自媚陰沍良不渝年豐已呈瑞獨有
孤羈身心驚雲物異閉門學袁安布帽聊卒歲

五憶詩吳興作

沈休文

王風降參離吾道久墜地嶢谷無遺音誰辨淄
澠味隱侯生知姿幽討窮玄義遂落四聲傳千
載發靈秘老來帶孔移風塵多顛顚觀其郊居
篇似亦遠名利遐哉景行思遺音誰與嗣

孟東野

貞曜有軼才漢落不諧世晚歲尤軼軻一官如
疣贅材大不稱身奇交衆所戾榮名固有時何
必當其際寒溪長風鳴古垣蒼藤翳逸軌安可
攀瞻言盟薛荔

趙子昂

吾憐趙王孫適丁陽九會北面羶罽朝無乃違
時晦毫素迴天工意氣抗百代誅茅水晶宮脩
然吸沆瀣寥寥三百年作者非其類鷗波多悲
風墨亭空蒼謁丘壑亦變遷風采復何在遺墨
留殘碑亦是神相對芳洲薦白蘋臨風發哀辭

孫太初

太白有山人脩若雲中鶴抗志入青冥逃光在
幽谷旣棲南屏峰隨卅菴溪築俛首事婚嫁亦

已失初服羽化竟何踈黃土高岑律不朽有令
名安在留其骨惆悵歸雲庵芳草年年綠

徐子與

正始失其傳作者競尸牖曼靡喪元氣情性復
何有徐子超津梁直繼何李後大鳴徹古今細
鳴金石扣中原固多才觀察得八斗乃有伯道
悲亦無彭聃壽嗟余來不辰荒墳無已久隕涕
讀遺言地下亦吾友大音知者稀獨坐空搔首
同陸履素轉運胡元瑞孝廉鄭翰卿山人

汪肇卻太學汎舟西湖至淨慈寺效謝

體得意字

水色浸稽天客心悲遠地風日多清陰安得不
沉醉憑虛俯崇陵眺迥挹空翠盤擎崩崖松繁
衍曲池芰密省蔓且荒倦雲飛復墜平岫入孤
舟踈鐘辨遠寺輞槩蕩夷猶初地啓靈閣坐送
千里目妙演三車意空色皆蔓根清淨本玄詣
神理倘不渝勝賞亦有至京洛多風塵會當脫
敝屣

早秋遊玉蓮亭

秋雨送新涼湖水亦漲綠惜此殘荷花斗酒烹
葵藿日落亂峰橫天曠歸雲獨渺渺波上帆瑟
瑟澗中竹月出魚乍驚霞飛鴈相逐山色有會
心寧但清人目興來藉草坐狂歌響千谷冉冉
風塵間何時返初服

冷泉亭

孤峰自西來飛泉日東去翠色倒寒波鏡裏芙
蓉樹草合澗已空石古亭猶踞潺湲日夕聲泠

然澹人慮雲散白練橫月落青山曙一夜秋水
生奔濤若灩澦坳念已盡消塵纓濯何處長嘯
起松風憑虛恍可御

送陳伯孺四首

送子下菰城秋風何慘悽賓鴻唳南陸落葉紛
修逵衆芳旣云徂遊子當安之桂席逐晨風振
策奔織離握手復欲別意滿難致詞天長望不
及延佇中傷悲

傷悲亦何爲天運固有戾人生非匏瓜安能久

相繫脩鱗狎頻波勁蹠隘顚地姬子雖云都不
如樵與悴它鄉美且穰無若丘與隧但得故所
歡何用復歔歔努力征途間瞻言加餐食

來時春郊明桃李齊作花去時天雨霜水國多
蕪葭桑晷日已短蕙衣日已單燕去空梁冷遊
子何當還眷此綢繆意矢心在歲寒

歲寒彫高梧伏吠籬菊邊丈夫咲入門兒女相
牽纏膝下拜慈母顏解復泪漣四鄰聞我來壓
酒擊海鮮苦樂各相勞夜靜聲更喧少年獨不

言咲贈遠遊篇

猛虎行寄吳翁晉

有引

困申冬余行部至孝豐翁晉侵晨來謁道爲
虎所困從者救之獲免賦此唁之

猛虎欲齧人不避賢與豪夫子蘊明德胡爲在
蓬蒿窮冬風怒悽陰合於菟號意不在狐兔豈
嗜噬中臊自顧雞肋涼寧足充老饕鼠肝與蟲
臂安能去子逃竄戚困飯牛彌明亦搏獒豺狼
當道行狐鳳哀嗷嗷天運爾何知耽耽求其曹

拔劒裂山石別有黃公刀驅爾渡河去蒼生看
建橐

題畫贈吳翁晉

幽禽棲枯枝不息惡木陰以彼百尺莖托此千
古心好音爲誰惠孤芳安可任鷹隼欲相妬終
歸嘉樹林

入真州

夙昔抱微尚適志在林壤入山胡不深而扞塵
世網意拙術匪工形稿神逾往欲借廣陵潮一

滌去來想度江風日佳春氣何蕭爽野潤游絲
繁天曠孤雲蕩嵐岫旣欹歛烟波亦渺莽結廬
遠喧闐交踈道彌廣慙謝朱紱榮獲恣滄洲賞
渴漱牛父流饑拾狙公橡容與扁舟間未作五
湖長

答謝于楚二首

吾宗多華詰神秀森鵲起康樂振曜采宣城嗣
逸軌勁足狹九垓崇幹庫八紀之子紹前胤耽
耽於菟視芳風暢薰澤奇音迴霍靡五十尚輒

軻真宰讎其美皎皎束素絲何必承筐篚隱矣
焉用文臨流洗吾耳

我行指仲春溽夏及江湄日夕欽良儔蓬心亦
已夷小謝從何來文理光陸離力輓頽波流遂
登正始涯調曠物靡合神王意自知而我崇玄
賞聞之爲歔歔世人擷春粵志士含秋暉勉旃
崇徽猷葆此玄豹姿

中秋集西林蘭若

積雨忽云霽微雲澹秋容誰將一片月懸之江

上峰鴈影薄脩竹露華寒青松撫景惜殘夜坐
聞西林鐘

宿楊干寺

午發豐水溪暮投楊干寺二十五里中秋衣濕
幽翠滿目楓林丹始知嚴霜至流水赴空潭冷
泠如有意孤山無四鄰殘僧擁衲寐碑蝕蒼苔
深稍辨咸通字夜色似太古溟濛但一氣半月
眉高松鬼火出深荔中宵零露寒斗酒未成醉
明發復行役塵多憔悴

容成臺

神仙不可見高臺空陳跡落葉無人行悲風動
松柏霜橋度馬危烟樹啼禽適具茨路欲迷徘徊日將夕

望天都峰

天高不可極地軸東南傾黃山抗神秀勢若相
搪撐憑空肆遙矚八極何冥冥浮雲遞變態孤
峰長自青礪淙戛寒玉石髓飛紫英幽色契妙
賞超忽乘太清緬懷軒轅氏委蛻遺世榮盈盈

小堂春曉集卷四
天漢末靡靡雲霓旌丹鼎不可見金簡詎能名
悵然遣物慮側身中屏營

雙溪雨宿朱文潛太學齋中

石間膚寸雲千林雨霖霖客子看山歸倉皇夜
投宿道逢三紫衣美者顏如玉肅客洞朱扉廣
筵藝華燭黃雞秋正肥紅友寒初熟盤薦雨中
葵庭殘霜後菊夜盡不成懽悲歌仍擊筑人生
聚豈常短景期逾促感此雲水心聊免窮途哭
明發登前途思君在空谷

旌陽別吳元翰

同爲失路人更作無家別
去住各吞聲北風吹
雨雪山枯飛鳥盡木落寒雲滅
歲晏誰與歸思
君心欲絕

己亥元日試筆示謝于楚

燕鴻懷北風越鳥戀南枝
志士多慷慨消息隨
天時夙昔好奇服中途成參差
一片海南雲因
風落江涯心擷九秋芳目驚二春暉
春暉不可
駐朱顏日以頹
江上流澌殘庭前綠華滋
昭丘

望不極 商山無還期 鷹隼翔雲衢 威鳳難獨棲
努力崇明德 願言借餘輝

題僧像

西來本無意 至人寧有身 四大皆假借 何從寫
其真 閑花落古洞 獨鳥啼松雲 禪性誰能解 空
堦麋鹿羣

効劉長卿雜興八詠

幽琴

猗猗龍門桐 裁爲綠綺琴 幸不死爨下 敢復辭

清音朱絃君弗御常恐風霜侵雍門與阿谷悠
悠千古心

晚桃

碧桃產空谷不爲衆卉先春風吹不到芳心爲
誰妍荆棘塞前途無言世所捐猶勝綏山上竊
以不材全

疲馬

櫪下老驪驕垂首無生氣空餘百戰身豈乏千
里志自憐赤汗姿久謝黃金轡徘徊向君嘶寒

上春難至

春鏡

寶鏡辭玉匣流落委黃塵可憐一片月屢照行
路人蛾眉終見妬肝膽誰相親請君重拂拭清
光猶自新

古劍

太阿埋古獄精光未墜地萋萋蝕龍紋誰辨斗
間氣匣中永夜鳴水鏐何曾試袖物終飛騰爲
君擊魑魅

廢井

城荒井不改甘泉猶可食一朝委榛蕪十載無人汲空沾微雨潤時有寒星入素綬何當垂母爲龍蛇蟄

白鷺

素質濯冰雪亭亭向孤嶼何意雲霄姿竟與魚蝦侶蒹葭秋已殘寒江難獨處矯首望冥鴻終當杳然舉

寒缸

不依日月光幸托帷幃下四壁風霜深獨照淒涼夜玉漏故沉沉花開復花謝蘭膏薄欲銷餘暉詎可借

回軍跋者

漢兵渡鴨綠已與胡鬼隣去時三十萬歸來復幾人飛矢沒脛骨血枯不可伸步步望南行乞食向城闔廬舍道傍樹枯枝爲車輪故鄉五千里但恐委征塵歸來四鄰改田園皆荆榛少年不相識攘臂生欺噍幸遂首丘願敢辭殘廢身

燈前懷舊事，吊影空酸辛。

七夕閨人

向夕蘭窓開，金針度絲縷。脉脉下瑤墀，含情皆不語。
微風生羅裳，雙星動錦杼。蒼茫見明河，相看泪如雨。

發真州別諸子

折坂無安蹄，風林少寧翼。頽波旣東徂，熹光復西匿。
行子逐轉蓬，朝盱不遑息。擬垂邗江綸，仍脂薊門軾。
仰送鴻鴈翔，俯攀楊柳色。別緒若絲

勞欲言涕沾臆早歲負好脩中道遭反側行止
信盈虛風波安終極白壁委精光何當重拂拭
揮手從此辭他鄉復異域贈君孟勞刀持此長
相憶

濠上

朝發池河濱莫見濠梁城日落西山橫蕭蕭淮
水清念昔莊蒙叟逍遙觀物情不知人與魚憂
樂誰爲櫻運適感大化勞役哀吾生臨流且三
歎聊用濯塵纓

齊魯道中

寒笳未夜悲客子能無泪代馬向北嘶越鴻復
南至滕薛有故墟齊魯多荒隧川原何逶迤莽
蒼尤靄黧木末起悲風黃塵漲天地不見綠華
滋安知背陽意宵士奔輪蹄至人耽玄味但存
丘叔齊賦波隨所詣

公冶里陰道中望岱作

巖客行曠野望山如到家遠視但一氣却疑寒
烟遮逶迤百餘里神爽競騰拏峰姿媚朝霽林

齊謳行
霽披夕華轉側互變幻遠近無不佳秋色正蕭
然層陰紛成霞目眩魂已飛安用窮幽遐遲迴
忽欲匿空聞昏林鴉

齊謳行

吳歆多侏僂秦聲亦卑陋丈人且安坐聽我歌
齊謳渭濱一釣叟龍飛風雲秋昨茅表東海十
二朝諸侯泰山奠坤維渤澥涵天流雲夢吞八
九俯仰無神州沃膏被原野珎錯仞芳羞桓桓
小白氏定霸盟葵丘服楚威已殫尊周誼誰儔

晏嬰匡弱室田單破強讎曾連三寸舌坐令秦
氛收薛公多意氣幸舍容蒯綬至今慕義士慷
慨赴前修然諾不辭死千金安所求霸圖久銷
歇往事空悠悠請君望牛山落日悲松楸

田婦詞

土饑雨苦稀麥穗半不熟賣女納官錢老婦吞
聲哭山繭脆難繰土布澁難縫十指磨欲掘不
辦朝昏供豈無少壯丁貧爲富家傭日受升合
米米陳不可舂茅茨僅四壁寒來自補葺草根

甘可茹髮免溝中瘠生時旣不諧流離安所適

夢徐惟和

生別凋容顏死別摧心肝昔我同門友高騫絕
世翰升沉一異域逝波無迴瀾誰指夢中路得
續生平歡陰風動羅幕夜色闇已闌但識面目
是寧記存亡端不言復不辭乘虛倏往還四顧
是耶非枕上孤燈殘徘徊淒欲絕孤鴈啼辛酸

早發東莞

層崖不容幘危石嚙我膝窮猿緣土門怒虎號

陰室濛濛三十里初見海底日木落兩壁寬雲
散衆峰出披莽亡故蹊出谷迷新術疲馬聲慘
悽途危易相失行侶雜坐卧足皸膚凜慄擾擾
車塵間微尚何時畢

閒居寄陳伯孺

適性無遠近微宦亦幽棲閉門謝公車高枕松
陰西叢蘭媚秋蝶古槐懸夕靄客心政夷曠好
鳥時一啼已欣塵境絕所惜知音攜搔首望不
極明月空清溪

感懷三首

白露下廣除綠英日以摧獨坐悲陽春霜風從
天來元化妙旋轉物華互榮衰古今皆一貫變
化詎可迴肝腸非金石安能不生哀

上士貴保真下士圖令名西山與東陵千古終
待衡不陟九垓表安知天地情天地無成功世
人徒營營

毒蛇當道蟠羣龍困在野行人不敢過鵠伏重
林下天步方艱難封狐競妖冶禍亦不在大福

亦不可假擾擾風塵中誰爲知幾者

夏日懷臧晉叔

一州如斗大獄空吏亦稀
企脚花陰下卧看松雲飛
蟬聲咽白日荷風香縞衣
升沉皆適性何必西山薇
離落念吾友佯狂歌式微
豈無知音想時乖願仍違
盈盈蒼溪水清淺蘆花磯
腸斷向誰道山風吹竹扉

節孝行爲清流王母賦

芝蘭不特芳桃李無孤妍皎皎
王家母素節何

高騫十三事君子中道忽棄捐矢死固不易存
孤良獨難春奩洗殘黛秋帷生薄寒上堂拜老
姑薤鹽亦以懽入門課二雛燔機和熊丸東壁
有餘光北堂多苦顏姑旣終天年子已長且賢
良人目可瞑相從歸九原卓彼閨中彥彤管行
不刊我歌節孝篇用激懦夫肝